

Na osnovu člana 128. stav (4) Zakona o osiguranju („Službene novine Federacije BiH“, broj 23/17)
Agencija za nadzor osiguranja Federacije Bosne i Hercegovine d a j e

MIŠLJENJE

o primjeni Odluke o uslovima za osiguranje vlasnika vozila od odgovornosti za štetu prouzrokovanu trećim licima i Odluke o načinu utvrđivanja tarife premije i cjenovnika za osiguranje vlasnika vozila od odgovornosti za štetu prouzrokovanu trećim licima

1. *Prekid police osiguranja zbog promjene vlasnika i obračun premije osiguranja prilikom prekida police osiguranja*

Odredbama člana 15. stav (4) Odluke o uslovima za osiguranje vlasnika vozila od odgovornosti za štetu prouzrokovanu trećim osobama („Službene novine Federacije BiH“, broj 77/20 - u daljem tekstu: Odluka o uslovima) propisano je da prilikom obračuna neiskorištenog dijela premije iz stava (3) ovog člana osiguranik ima pravo na neiskorišteni dio premije utvrđen po principu „pro rata temporis“, na ugovorenu bruto premiju osiguranja, umanjenu najviše za 12% na ime troškova provođenja osiguranja. Članom 15. stav (3) Odluke o uslovima je propisano da ako se vozilo odjavi kod nadležnog organa u skladu sa članom 9. stav (6) Zakona o obaveznim osiguranjima u saobraćaju („Službene novine Federacije BiH“, broj 57/20 - u daljem tekstu: Zakon), osiguranje se prekida na dan podnošenja zahtjeva za prekid i vraća neiskorišteni dio premije (pro rata temporis) u skladu sa stavom (4) ovog člana. Osim u slučaju iz člana 45. stav (3) Zakona kada se osiguranje prekida sa danom zaključenja ugovora o osiguranju od strane novog vlasnika vozila. Neiskorišteni dio premije vratit će se u slučaju kada na osnovu tog osiguranja nije bila isplaćena šteta, odnosno ako nije bio postavljen odštetni zahtjev na osnovu kojeg bi kasnije trebalo isplatiti štetu.

Navedenim odredbama je definisano ko i pod kojim uslovima ima pravo na povrat neiskorištenog dijela premije, te ***nije definisano bilo kakvo izuzeće*** koje se odnosi na primjenu predviđenog umanjenja na ime troškova provođenja osiguranja.

Na osnovu naprijed navedenih odredbi društvo za osiguranje će prilikom obračuna neiskorištenog dijela premije osiguranja, obračunatog pod uslovima i na način kako je navedeno u članu 15. st. (3) i (4) Odluke o uslovima umanjiti obračunatu bruto premiju najviše za 12% na ime troškova provođenja osiguranja.

Primjer:

Društvo za osiguranje prilikom obračuna neiskorištenog dijela premije ukoliko je procenat umanjenja 12% postupa na slijedeći način:

Bruto premija iskazana na polici osiguranja	Procenat umanjenja	Iznos umanjenja	Bruto premija - umanjen je	Broj dana trajanja police osiguranja	Iskorišteni broj dana	Neiskorišteni broj dana	Premija po danu	Obračunata premija za neiskorišteni broj dana
1	2	3=1x2	4=1-3	5	6	7=5-6	8=4/5	9=8x7
1.000,00	12%	120,00	880,00	365	200	165	2,41	397,81

Prilikom knjigovodstvene evidencije društvo za osiguranje u poslovnim evidencijama ne iskazuje posebno obračunati iznos umanjenja na ime troškova provođenja osiguranja, već evidentira prekid osiguranja u skladu sa Pravilnikom o primjeni kontnog okvira društava za osiguranje, Međunarodnim računovodstvenim standardima i Međunarodnim standardima finansijskog izvještavanja.

2. Promjena vlasnika vozila

Odredbama člana 45. stav (1) Zakona, člana 8. stav (5) Odluke o načinu utvrđivanja tarife premije i cjenovnika za osiguranje vlasnika vozila od odgovornosti za štetu prouzrokovanu trećim licima („Službene novine Federacije BiH“, broj 77/20 – u daljem tekstu: Odluka o tarifi) i člana 16. stav (1) Odluke o uslovima je propisano da, ako se za vrijeme trajanja osiguranja promijeni vlasnik vozila, novi vlasnik vozila dužan je zaključiti ugovor o osiguranju svoje odgovornosti za upotrebu vozila na kojem je stekao vlasništvo.

Iz navedenih odredbi nedvosmisleno proizilazi da je novi vlasnik vozila dužan zaključiti ugovor o osiguranju svoje odgovornosti za upotrebu vozila na kojem je stekao vlasništvo, odnosno da stari vlasnik vozila ne može izvršiti ustupanje police osiguranja koja glasi na njegovo ime.

Odredbama člana 45. stav (2) Zakona, člana 8. stav (7) Odluke o tarifi i člana 16. stav (2) Odluke o uslovima se propisuju obaveze starog vlasnika vozila na način da je osiguranik koji otuđi svoje vozilo dužan o tome obavijestiti društvo za osiguranje kod kojeg je osigurana njegova odgovornost za upotrebu vozila koje je otuđeno u roku od 30 dana od dana otuđenja vozila i postupiti u skladu sa članom 9. stav 6. Zakona.

Odredbama člana 45. stav (3) Zakona, člana 8. stav (8) Odluke o tarifi i člana 16. stav (3) Odluke o uslovima je propisano da ugovor o osiguranju od autoodgovornosti zaključen s prethodnim vlasnikom **prestaje da važi** u trenutku kada je novi vlasnik vozila zaključio ugovor o osiguranju od autoodgovornosti na svoje ime. Nadalje, odredbama člana 45. stav (4) Zakona, člana 8. stav (9) Odluke o tarifi i člana 16. stav (4) Odluke o uslovima je propisano **da prestankom važenja ugovora** iz člana 45. stava (3) Zakona osiguranik, prethodni vlasnik vozila, ima pravo na povrat dijela premije za neiskorišteni period pokrića, pod uslovom da je postupio u skladu sa obavezom iz člana 45. stav (2) Zakona, člana 8. stav (7) Odluke o tarifi i člana 16. stav (2) Odluke o uslovima i u slučaju da nije bilo štete u periodu osiguranja po navedenoj polici.

Članom 9. stav (6) Zakona je propisano da ako ugovor o obaveznom osiguranju **prestane važiti prije isteka osiguranog perioda, prekid police** ne može se izvršiti dok se ne dostavi potvrda od nadležnog organa za registraciju vozila da je vozilo objavljeno.

Navedenim odredbama propisano je da prethodni vlasnik vozila ne može izvršiti prekid police osiguranja niti izvršiti povrat dijela premije osiguranja za neiskorišteni period pokrića osiguranja dok novi vlasnik vozila ne zaključi ugovor o osiguranju od autoodgovornosti na svoje ime. Pored navedenog u skladu sa odredbom člana 45. stav (4) Zakona, člana 8. stav (9) Odluke o tarifi i člana 16. stav (4) Odluke o uslovima, uslov za povrat premije osiguranja za neiskorišteni period

pokrića osiguranja jeste da je društvo za osiguranje obavješteno u roku od 30 dana od dana otuđenja vozila osiguranika.

Dokaz o zaključenom ugovoru o osiguranju od autoodgovornosti novog vlasnika vozila na svoje ime može biti od strane nadležnog organa ovjerena kopija zaključene police osiguranja ili original potvrda izdata od strane društva za osiguranje kojom se potvrđuje da je novi vlasnik vozila zaključio policu osiguranja u periodu trajanja od (datum početka osiguranog pokrića) do (datum prestanka osiguranog pokrića) otuđenog vozila.

Odbredbama člana 10. stav (3) Odluke o tarifi i člana 13. stav (4) Odluke o uslovima, između ostalog je propisano da ako je do prekida osiguranja došlo prije isteka godine osiguranja, a u MRP-u nije bilo prijavljenih šteta, te šteta nije prijavljena ni u drugim MRP-ima unutar prekida osiguranja osiguranik prilikom zaključenja novog ugovora o osiguranju ima pravo na isti premijski stepen za isto vozilo ili za vozilo koje je promijenio unutar iste premijske grupe, ako prekid nije trajao duže od tri godine.

Iz naprijed iznijetog proizilazi da ukoliko nisu ispunjeni uslovi da je polica osiguranja prekinuta na način propisan Zakonom, Odlukom o tarifi i Odlukom o uslovima **isti ne ostvaruje pravo** propisano odredbom člana 10. stav (3) Odluke o tarifi i člana 13. stav (4) Odluke o uslovima.

Društva za osiguranje su u obavezi ukoliko kod istih bude prijavljen odštetni zahtjev po osnovu ispunjenih uslova iz člana 45. stav (5) Zakona o osiguranju, uz ispunjenje uslova propisanih u istom, u evidenciji odštetnih zahtjeva kao osiguranika evidentirati novog vlasnika vozila ex lege.

Do stupanja na snagu Zakona, a u skladu sa uputom za postupanje Agencije za nadzor osiguranja Federacije Bosne i Hercegovine (u daljem tekstu: Agencija za nadzor) dostavljene svim društvima za osiguranje, podružnicama društava za osiguranje iz Republike Srpske i Udruženje društava za osiguranje u Federaciji BiH aktom broj: 01-03.2-2-059-1019/17 od 28.04.2017. godine a u vezi sa aktom broj: 1.0-059-1019/17 od 13.04.2017. godine, u cilju smanjenja broja neosiguranih vozila, navedeno je da:

- u slučaju da je stari vlasnik police osiguranja ustupio važeću policu osiguranja motornog vozila koje prodaje novom vlasniku do isteka perioda trajanja police osiguranja, društva za osiguranje su uz ispunjenje uslova navedenih u dostavljenoj uputi, trebala posmatrati da je izvršen prekid police osiguranja starog vlasnika a da se isti potpisom izjave pod punom materijalnom i krivičnom odgovornošću (ovjerenom kod nadležnog organa) da neće zahtjevati naknadni prekid police osiguranja odrekao istog u periodu trajanja iste,
- upisom novog vlasnika na policu osiguranja shodno odredbi člana 13. Uslova za osiguranje od automobilske odgovornosti koje je donio Upravni odbor Biroa osiguranja Bosne i Hercegovine (u daljem tekstu: Uslovi), prava i obaveze iz ugovora o osiguranju od autoodgovornosti prenose se na novog vlasnika odnosno korisnika i traju do isteka tekućeg razdoblja osiguranja bez prava iz „pričeknog roka“ utvrđenog u članu 7. stav (3) Uslova.
- stari vlasnik prema naprijed navedenom ostvaruje prava u skladu sa odredbom glave III tačka 2. stav (2) Premijskog sistema X-AO za osiguranje od automobilske odgovornosti u Bosni i Hercegovini (u daljem tekstu: Premijski sistem X-AO) kojim je propisano da ako je do prekida osiguranja došlo prije isteka godine osiguranja, a u MRP nije bilo prijavljenih šteta, te šteta nije prijavljena ni u drugim MRP unutar prekida osiguranja, osiguranik prilikom obnove ugovora o osiguranju ima pravo na isti premijski stepen za isto vozilo ili za vozilo koje je promijenio unutar iste premijske grupe, ako prekid nije trajao duže od tri godine. U skladu sa odredbom glave III tačka 2. stav (3) Premijskog sistema X-AO određeni premijski stepen (Bonus) po ovom osnovu jedan osiguranik može koristiti najviše dva puta u toku jedne kalendarske godine.

U skladu sa gore navedenim, potrebno je posmatrati „ustupljene“ police osiguranja i izvršene prekide istih, odnosno ostvareno pravo na prenos stečenog prava na bonus po osnovu prekinute police osiguranja do momenta stupanja na snagu Zakona odnosno do 27.08.2020. godine i nemogućnost „ustupanja“ odnosno prekida police osiguranja, kako je navedeno gore u tekstu, u skladu sa odredbama člana 45. Zakona, nakon stupanja na snagu istog.

3. Dokaz o izvršenoj odjavi vozila

Dokazi na osnovu kojih društvo za osiguranje utvrđuje status osiguranog vozila osiguranika su:

- Potvrda/uvjerenje nadležnog organa za registraciju motornog vozila na kome je evidentirano da je predmetno vozilo objavljeno iz razloga (uništenje, mirovanje, prodaja, itd.), ili
- Ovjerena kopija vlasničke knjižice na kojoj je naveden podatak o odjavi vozila sa datumom odjave, ili
- Ovjerena kopija potvrde o registraciji na kojoj je naveden podatak o odjavi vozila sa datumom odjave.

Pored naprijed navedenih dokumenata, ukoliko se iz evidentiranih podataka na istim ne može utvrditi razlog odjave, osiguranik je obavezan da dostavi ovjerene kopije drugih dokumenata kojima dokazuju razloge kao što su: ugovor o kupoprodaji, izjava o nekorištenju vozila i sl.

4. Prekid police osiguranja i pravo na premijski stepen u slučaju krađe vozila

Odredbama člana 26. stav (1) Zakona je propisano da ako je štetu prouzrokovao neovlašteni vozač, oštećeno lice može podnijeti odštetni zahtjev odgovornom društvu za osiguranje, osim u slučaju iz člana 24. stava (2) tačka d) ovog zakona.

Neovlaštenim vozačem se u skladu sa pojmom iz člana 2. stav (1) tačka g) Zakona smatra se lice koje je u vrijeme štetnog događaja koristilo vozilo bez saglasnosti vlasnika.

Na osnovu naprijed navedenih odredbi Zakona polica osiguranja autoodgovornosti vozila koje je ukradeno ne može se prekinuti, ali je društvo u obavezi, nakon što vlasnik vozila dostavi potvrdu od strane nadležnog organa kojom se dokazuje da je vozilo ukradeno te da isto nije pronađeno u roku od 30 dana od dana krađe, izdati potvrdu o stečenom pravu na bonus osiguranika, **bez prekida police osiguranja**, u smislu odredbi člana 13. st. (7) i (9) Odluke o uslovima. Potvrda koju izdaje društvo za osiguranje u navedenom slučaju pored podataka iz tačke 20. ovog Mišljenja treba da sadrži i napomenu da je osiguranik u obavezi prijaviti pronalazak ukradenog vozila društvu za osiguranje kako bi se izvršila korekcija premijskog stepena na osiguranom novom vozilu.

5. Podatak o vrsti vozila i obliku karoserije na polici osiguranja

Odredbama člana 9. stav (1) Zakona propisano je da je društvo za osiguranje dužno zaključiti ugovor o obaveznom osiguranju u skladu s ovim zakonom, uslovima osiguranja, tarifama i cjenovnicima osiguranja.

Agencija za nadzor je na osnovu odredbi člana 11. stav (2) Zakona donijela Odluku o tarifi na osnovu koje postupaju društva za osiguranje prilikom obračuna premije osiguranja kod zaključivanja polica osiguranja autoodgovornosti.

Članom 2. Odluke o tarifi je propisano da podaci navedeni u potvrdi o registraciji „vrsta vozila“ i „oblik karoserije“ se posmatraju zajedno kod određivanja pripadajuće premijske grupe predmetnog vozila propisane ovom Odlukom.

Podaci evidentirani na polici osiguranja trebaju da odgovaraju podacima evidentiranim u Potvrdi o registraciji predmetnog vozila.

Podaci o vrsti vozila i obliku karoserije su podaci iz Potvrde o registraciji, podatak o tarifnoj grupi nije podatak koji je u nadležnosti MUP-ova već u **isključivoj nadležnosti** Agencije za nadzor.

Odredbama člana 70. stav (1) Zakona je propisano da nadzor nad primjenom odredbi Zakona i akata donesenih na osnovu Zakona, u dijelu koji se odnosi na društva za osiguranje, podružnice društava za osiguranje iz RS koje obavljaju djelatnost na teritoriji Federacije i Zaštitni fond, obavlja Agencija za nadzor.

6. Primjena akata donesenih od strane Agencije za nadzor po osnovu ranije važećih Uslova i Cjenovnika

Stupanjem na snagu Odluke o uslovima i Odluke o tarifi (31.10.2020. godine) prestali su da važe Uslovi osiguranja od autoodgovornosti kao i Premijski sistem X-AO za osiguranje od autoodgovornosti koje su društva za osiguranje primjenjivala od 1998. godine.

Prestankom važenja naprijed navedenih akata prestale su da važe i sve instrukcije, upute i mišljenja koje je Agencija za nadzor donijela u vezi sa primjenom istih.

7. Dokumenti kojima se dokazuje namjena vozila

Odredbama člana 2. stav (2) Odluke o tarifi propisano je da za utvrđivanje osnovnih podataka o vozilu (vrsta, marka, tip, izvedba, namjena, snaga, radni obim motora, broj mjesta, nosivost i sl.) mjerodavna je potvrda o registraciji. Ako za vozilo koje se osigurava nije još izdata ili nije propisana potvrda o registraciji, tada su mjerodavni podaci proizvođača vozila ili drugi mjerodavni dokazi kao što su carinska deklaracija, potvrda o izvršenom atestu na vozilu, potvrda o tehničkom pregledu, potvrda o homologaciji sl.

8. Minimalna premija za naplatu

Odredbama člana 4. stav (7) Odluke o tarifi je propisano da popust iz člana 13. stav (6) i člana 18. stav (4) Odluke o tarifi ukupno sa umanjenjima premije po osnovu bonusa i svih drugih popusta predviđenih Odlukom o tarifi mogu iznositi najviše do 60% od osnovne premije. U navedenoj odredbi se jasno navodi da osiguraniku koji ima pravo na bonus u iznosu 50% osnovne premije osiguranja i popust na invalidnost u iznosu 20% osnovne premije osiguranja ukupna bruto premija (premija koja se naplaćuje) ne može biti manja od 40% osnovne premije osiguranja odnosno ukupni bonusi i popusti mogu iznositi maksimalno 60% osnovne premije osiguranja.

9. Prenos prava na premijski stepen iz inostranstva

Odredbama Odluke o tarifi i Odluke o uslovima propisano je da se osiguraniku priznaju prava na stečeni stepen bonusa po osnovu potvrda osiguravajućih društava koja posluju na teritoriji Bosne i Hercegovine, odnosno potvrde izdate od strane osiguravajućih društava koja ne posluju na teritoriji Bosne i Hercegovine **ne mogu** se uzeti kao osnov za priznavanje stečenog prava na bonus.

10. Izdavanje potvrde od strane društva za osiguranje

Odredbama člana 13. st. (7) i (9) Odluke o uslovima su propisani uslovi pod kojima su društva za osiguranje u obavezi da izdaju potvrde na zahtjev osiguranika i to:

- U slučaju prekida police osiguranja osiguravač je dužan zadržati originalni primjerak police osiguranja koja se prekida i izdati potvrdu o stečenom pravu na premijski stepen osiguraniku na osnovu podnesenog zahtjeva odmah, a najkasnije u roku od 24 sata od dana kompletiranja dokumentacije.
- U slučaju gubitka ili uništenja police osiguranja po isteku osiguravajućeg perioda osiguravač je u obavezi na zahtjev osiguranika izdati potvrdu o stečenom premijskom stepenu odmah, a najkasnije u roku od 24 sata od dana kompletiranja dokumentacije. Uz navedeni zahtjev osiguranik je dužan dostaviti:

- a) fizičko lice izjavu ovjerenu kod nadležnog organa o gubitku ili uništenju police osiguranja;
- b) pravno lice potpisanu i ovjerenu izjavu od strane ovlaštenog/odgovornog lica pravnog lica o gubitku ili uništenju police osiguranja.

11. Određivanje premijskog stepena

U skladu sa članom 24. Odluke o uslovima i članom 25. Odluke o tarifi, osiguraniku koji će osiguravati vozilo nakon stupanja na snagu istih, potrebno je prvo odrediti premijski stepen na koji ima pravo, a koji je stekao u prethodnom periodu, a nakon toga dodijeliti istom premijski stepen na koji ima pravo, a u skladu sa Odlukom o uslovima odnosno Odlukom o tarifi.

Primjer:

Osiguranik koji je na prethodnoj polici osiguranja imao stečeni premijski stepen 4. sa ostvarenim bonusom od 35% kod zaključenja nove police osiguranja, uz uslov da je isti ostvario pravo na smanjenje premijskog stepena u skladu sa odredbama Odluke o uslovima odnosno Odluke o tarifi, prvobitno stečeni premijski stepen u skladu sa članom 24. Odluke o uslovima odnosno članom 25. Odluke o tarifi postaje premijski stepen P2. sa ostvarenim bonusom od 40% osnovne premije i na isti, uvažavajući naprijed navedni uslov, ima pravo na smanjenje u skladu sa članom 9. stav (9) Odluke o tarifi za jedan premijski stepen odnosno isti kod zaključenja nove police osiguranja ima pravo na premijski stepen P1. sa ostvarenim bonusom od 50% osnovne premije osiguranja.

12. Priznavanje premijskog stepena

Postojanje prava iz člana 13. stav (1) Odluke o uslovima društvu za osiguranje treba da bude dokazano u zavisnosti od slučaja do slučaja te je osiguranik u obavezi da priloži potrebnu dokumentaciju čije je kopije potrebno ovjeriti kod nadležnog organa kao npr: darovni ugovor, rješenje o nasljeđivanju, izvod iz sudskog registra kojim se dokazuje da je fizičko lice osnivač obrta odnosno poljoprivrednog gazdinstva, odluku o osnivanju pravnog subjekta, rješenje sudskog registra o osnivanju odnosno izmjeni podataka za pravno lice koje osniva fizičko odnosno pravno lice, ugovore o izvršenim statusnim promjenama pravnog lica sa dokazom o izvršenoj izmjeni upisom podataka u sudski registar, rješenje o spajanju odnosno pripajanju dva pravna lica, rješenje o stečaju odnosno likvidaciji pravnog lica, ugovor o pruženoj usluzi lizinga od strane pravnog lica koje pruža lizing usluge itd.

Ukoliko se prenos prava sa police osiguranja u skladu sa odredbom člana 13. stav (1) Odluke o uslovima izvrši u toku trajanja police osiguranja, društvo za osiguranje koje je izdalo policu osiguranja sa koje se prenose prava je u obavezi:

- na zahtjev osiguranika koji stiče pravo, uz prezentaciju gore navedene dokumentacije, izvršiti zamjenu police osiguranja koja traje na način da će izdati novu policu osiguranja na ime lica koje stiče pravo sa periodom pokrića od dana podnošenja zahtjeva do dana trajanja police osiguranja koja se mijenja;
- izdavanjem zamjenske police osiguranja novi vlasnik vozila ima pravo na premijski stepen naveden na polici osiguranja koja se mijenja;
- izdavanjem zamjenske police osiguranja društvo za osiguranje prekida i zadržava policu osiguranja koja se mijenja uz svu ostalu dokumentaciju.

Prilikom obnove osiguranja lica koje je steklo pravo na premijski stepen u skladu sa prethodno navedenom odredbom, zamjensku policu osiguranja je potrebno posmatrati kao kratkoročnu policu osiguranja na način zadržavanja premijskog stepena bez prava na smanjenje istog, sa pravom pomicanja za tri premijska stepena više za svaku štetu prijavljenu u MRP-u.

Ukoliko se prenos prava sa police osiguranja u skladu sa odredbom člana 13. stav (1) Odluke o uslovima izvrši nakon isteka trajanja police osiguranja, društvo za osiguranje je kod obnove osiguranja istog vozila ili zaključenjem novog osiguranja kod promjene vozila potrebno posmatrati stečeno pravo uz pravo na umanjenje premijskog stepena u skladu sa članom 9. Odluke o tarifi.

13. Postupanje u slučaju kada na vozilu nije promjenjena vrsta vozila, namjena niti oblik karoserije već je na prethodnoj polici društvo za osiguranje pogrešno obračunalo premiju (obračunata premija za putničko, a vozilo spada u radno) u kontekstu prava na premijski stepen

U slučaju evidentirane greške na polici osiguranja u podacima o vrsti vozila, obliku karoserije i namjeni vozila upisane od strane društva za osiguranje na polici osiguranja koju osiguranik koristi kao dokaz o stečenom pravu na bonus odnosno malus i pravu istog na smanjenje odnosno povećanje premijskog stepena potrebno je prethodno navedenu policu osiguranja prihvatiti kao valjanu u smislu odredbi o bonusu/malusu iz razloga što bi neprihvatanjem iste osiguranik izgubio stečeno pravo ne svojom krivicom.

14. Postupanje u skladu sa članom 23. stav (3) Odluke o tarifi

Društva za osiguranje su prilikom osiguranja motornih vozila sa privremenim registarskim oznakama dužna da postupaju u skladu sa odredbama člana 23. stav (3) Odluke o tarifi.

15. Postupanje u vezi tarifne grupe 8, premija za teretna vozila za 90 dana osiguranja

Društva za osiguranje su prilikom osiguranja motornih vozila inostrane registracije dužna da postupaju u skladu sa odredbom člana 20. stav (2) Odluke o tarifi.

16. Režijski dodatak

Odredbama člana 3. stav (8) Odluke o tarifi propisano je da je režijski dodatak dio premije za obavljanje djelatnosti osiguranja koji svako društvo izdvaja od ukupne bruto premije osiguranja i on iznosi 30%. Sredstava režijskog dodatka društvo za osiguranje koristi za pokrivanje svih režijskih troškova pa tako i troškova pribave.

17. Šifrnici za doplatke i popuste iz Odluke o tarifi

Agencija za nadzor je u okviru Tehničke dokumentacije uz Pravilnik o registru polica i šteta za osiguranje vlasnika odnosno korisnika motornih vozila od odgovornosti za štete pričinjene trećim licima („Službene novine Federacije BiH, broj 103/18) objavila i šifrnici koji je usklađen sa odredbama Odluke o tarifi.

Prethodno navedena dokumentacija je objavljena na web stranici Agencije za nadzor na linku: <http://www.nados.ba/bs/tehnickadokumentacija/> u okviru kog je potrebno izvršiti download zip fajla u kojem, između ostalog, je kreiran file naziva: AO_TU_v15.pdf u kojem su definisani šifrnici i njihova upotreba.

18. Obračun premije i osiguranje vozila na električni pogon

Premija osiguranja putničkih vozila na električni pogon se računa na isti način kao i premija motornih vozila na način propisan članom 13. Odluke o tarifi, odnosno korištenjem podataka iz tabele PREMIJSKE GRUPA 1 - PUTNIČKI AUTOMOBILI iz Cjenovnika za osiguranje od autoodgovornosti u Federaciji Bosne i Hercegovine, obzirom da je u okviru navedene grupe kriterij kod obračuna premije snaga vozila izražena u kilovatima, a električna vozila također, snagu vozila izražavaju u kilovatima.

19. Osiguranje šinskih vozila

Odredbama člana 11. stav (2) Zakona je propisano da Agencija za nadzor donosi zajedničku tarifu premija i propisuje uslove za osiguranje vlasnika vozila od odgovornosti za štetu prouzrokovanu trećim licima, koji ostaju na snazi do kraja oktobra 2022. godine.

Članom 3. stav (1) tačka h. Zakona je propisano da je vozilo svako motorno vozilo namijenjeno za saobraćaj na kopnu koje se kreće snagom vlastitog motora, ali se ne kreće po šinama, i svako priključno vozilo, priključeno ili ne, koje podliježe obavezi registracije te prema propisima o registraciji mora imati potvrdu o registraciji.

Društva za osiguranje imaju mogućnost da u okviru vrste osiguranja ostala osiguranja od odgovornosti donesu uslove i tarifu za osiguranje vrste rizika 13.05 Osiguranje od odgovornosti u željezničkom prometu.

20. Potvrda o stečenom premijskom stepenu

Potvrda koju izdaju društva za osiguranje u skladu sa odredbom člana 13. st. (7) i (9) Odluke o tarifi mora da sadrži minimalni skup podataka i to:

- Broj potvrde (sadrži kontrolni broj prekinute police osiguranja);
- Kontrolni broj prekinute police osiguranja;
- Ime i prezime/naziv osiguranika sa upisanim matičnim brojem/ID broj;
- Adresa osiguranika;
- Period trajanja osiguranja po navedenoj polici;
- Podatak da li je preneseni premijski stepen ostvaren na prekinutoj polici osiguranja stečen na osnovu potvrde (DA/NE), ukoliko je odgovor DA potrebno je upisati podatak o broju potvrde i nazivu osiguravajućeg društva kod kojeg je osiguranik po prekinutoj polici ostvario pravo na premijski stepen;
- Datum prekida;
- Stečeni premijski stepen po prekinutoj polici osiguranja;

- Podatak da li je bilo prijavljenih šteta u periodu od dana zaključenja prekinute police osiguranja do dana prekida police osiguranja;
- Premijska grupa vozila koje je bilo osigurano po prekinutoj polici osiguranja.

Potvrde se izdaju u dva primjerka od kojih osiguranik zadržava jedan primjerak a drugi primjerak se zadržava u arhivi društva sa pripadajućom dokumentacijom. Društvo za osiguranje osiguraniku izdaje samo jedan originalan primjerak potvrde, kako ne bi došlo do mogućih zloupotreba iste.

Ukoliko društvo za osiguranje osiguraniku priznaje pravo na premijski stepen na osnovu potvrde potrebno je da se kao kontrolni broj prethodne police osiguranje navede kontrolni broj prekinute police osiguranja naveden na potvrdi, a ne broj potvrde.

21. Primjena člana 10. Odluke o tarifi

Pravo osiguranika na prenos prava na premijski stepen po osnovu promjene vozila u skladu sa odredbom člana 10. stav (5) Odluke o tarifi vezano je za osiguranika i predmetno vozila i odnosi se kako na fizička tako i na pravna lica.

Navedenom odredbom se propisuje da osiguranik ukoliko ima više vozila prava propisana odredbom člana 10. Odluke o tarifi se utvrđuju za svako vozilo ponaosob.

22. Primjena Odluke o uslovima i Odluke o tarifi u kontekstu postupaka javnih nabavki

Društva za osiguranje su bez obzira na zaključene ugovore u postupcima javnih nabavki u skladu sa odredbama člana 77. stav (1) Zakona dužna uskladiti svoje poslovanje s odredbama Zakona u roku od 90 dana od dana njegovog stupanja na snagu, izuzev ako odredbama Zakona za pojedina pitanja nije određen drugi rok.

Članom 11. stav (2) Zakona o obaveznim osiguranjima u saobraćaju propisano je da Agencija za nadzor donosi zajedničku tarifu premija i propisuje uslove za osiguranje od autoodgovornosti, koji ostaju na snazi do kraja oktobra 2022. godine.

Agencija za nadzor je donijela Odluku o uslovima i Odluku tarifi koje su stupile na snagu 31.10.2020. godine i objavljene u „Službenim novinama Federacije BiH“ broj 77/20.

Stupanjem na snagu Odluke o uslovima i Odluke o tarifi prestali su da važe Uslovi osiguranja od automobilske odgovornosti i Premijski sistem X-AO za osiguranje od automobilske odgovornosti koje su društva za osiguranje primjenjivala od 1998. godine.

23. Prenos bonusa za zamjensko vozilo

Odredbama člana 13. stav (4) Odluke o uslovima i članom 10. stav (3) Odluke o tarifi je propisano da, ako je do prekida osiguranja došlo prije isteka godine osiguranja, a u MRP-u nije bilo prijavljenih šteta te šteta nije prijavljena ni u drugim MRP-ima unutar prekida osiguranja, osiguranik prilikom zaključenja novog ugovora o osiguranju ima pravo na isti premijski stepen za isto vozilo ili za vozilo koje je promijenio unutar iste premijske grupe, ako prekid nije trajao duže od tri godine. Ako je do prekida osiguranja došlo po isteku godine osiguranja, a u MRP-u nije bila prijavljena šteta, te šteta nije prijavljena ni u drugom MRP-u unutar prekida osiguranja, osiguranik prilikom zaključenjanovog ugovora o osiguranju ima prvo na jedan premijski stepen niže za isto vozilo ili za vozilo koje je promijenio unutar iste premijske grupe, ako prekid nije trajao duže od tri godine.

Navedenim odredbama se ne postavljaju uslovi kada je izvršena promjena vozila, već da je izvršena promjena vozila, u skladu sa naprijed navedenim uslovima, pored uslova da je polica osiguranja prekinuta (prekid unutar osiguravajućeg pokrića ili prekid zbog isteka osiguranog pokrića).

24. Obaveza postupanja po Mišljenju

Društvo za osiguranje iz Federacije Bosne i Hercegovine i podružnica društva za osiguranja iz Republike Srpske koje posluju na teritoriju Federacije Bosne i Hercegovine dužni su u svom poslovanju na teritoriji Federacije Bosne i Hercegovine postupati u skladu sa ovim Mišljenjem.

DIREKTOR

Dinako Musluin



Broj: 01-059-3514/20
U Sarajevu, 07.12.2020. godine